

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 633 del 13/03/2026

Manà fora su Trentino Tv l program l vegn endrezà dal Comun General de Fascia

“Pedies” : con en sabeda ai 14 de mèrz vegn fora la puntata #529 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 529. I argomenc de chesta puntata l é l spetacol “Miss Sbarbie” portà dant a Cianacei en ocajion del Dì internazionèl de la eles, la garejèdes de Copa del Mond sun Sèn Pelegrin con de resultac ecezionèi per la atletes taliènes, e la rubrica “Svampol ciatarul: dedichèda a Elisa Vian che la ne conta de sie percors per doventèr la femena determinada de anchecondi

L Comun General de Fascia, l grop Circenesema, l Chino Marmolèda e la biblioteca de Cianacei adum i à endrezà na sera de spas e sensibilizazion en ocajion del dì internazionèl de la eles. La sera la é peèda via co n aperitif leterèr, n moment de confront e barat informal. Dò l é stat portà dant la performance de l’artista Morgana Morandi, che la se à prejentà con sia 101 Barbie e l Ken uman. L message per la eles volea esser chel de jir fora da la costrizions de coche la sozietà veit e la vel la femenes, lurèr su l’empontanza de coche se é, sul esser se enstesses a na maniera originèla e autentica.

L é stat n fin de setemèna ecezionèl per Sèn Pelegrin l ultim week end. Resultac sportives de gran valuta e comenc positives da dut l mond del schi per l’organizazion e per duta Fascia. Trei dis de garejèdes de Copa del Mond de la eles che à vedù la atletes taliènes arjonjer de bie resultac e se vadagnèr i piazzamenc più auc. Ma no demò chest. De gregn aprijiamenc i é rué ence per l Comitac Gregn Evenc e duta l’organizazion. N suzess che l à vedù 130 televijions coleèdes da dut l mond e passa 7mile spetadores. L obietif ades l é chel de portèr ogne an chesta garejèdes de Copa del Mond te Fascia.

Per la rubrica “Svampol ciatarul: jent che fèsc jerveèr sie cunst”: Elisa Vian ne conta de sie percors per doventèr la femena determinada de anchecondi. Elisa la é da Vich, la é psicologa e la porta dant percors de formazion de soft skills: più avisa la deida e la ge stèsc apede ai imprendidores per ge didèr a tirèr fora la pèrt miora de se. Ela la ne conta de coche la é ruèda a chest resultat, de si studies de psicologia a Roma, de canche l’ à lurà desche formadora te na firma e de coche l’ à avert sia pruma filiala a Busan. L valor de so lurier l é leà en gran pèrt a la comunicazion e a la negoziazion. Ma no demò; te si percors vegn dat gran emportanza ence a l’empatia, e a la emozions. Aldò de sia vijion, te l’era de l’inteligenza artificzièla l é n muie emportant aer coscienza de nosc esser uman, entener la emozions e saer les durèr.

I reports de chesta setemèna i é stac enjigné e porté dant da Angela Pederiva e Riccardo Zanoner.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN-** vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program l va fora ence su **AltoAdige TV – canal 11 Prov. de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:
<https://www.youtube.com/@TvLadina>

La puntata de chesta setemèna la vegnarà fora entorn la medema ora de la televijion.

Se pel veder i report un a un su la piata Facebook de TV Ladina.
<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)